

**QUESTION ORALE DEPOSEE PAR MONSIEUR XAVIER LUCIANI
AU NOM DU GROUPE « FEMU A CORSICA »**

OBJET : Pulitica à prò di a lingua corsa ?

O sgiò Presidente,

Mese fà, s'hè parlatu assai di u CAPES di Corsu. Per contu nostru, arricurdatevi, n'aviamu pigliatu a pratesa una bella stonda à l'Assemblea, cù l'idea tandu di palisà e faccende parigine, cù sta superba di decide solu, verticalamente, centralistamente, senza a minima cuncertazione cù l'attori di quì, quelli di a furmazione, quelli di e filiere universitarie, o puru l'amministrazione di u Retturatu. E' ùn parlu mancu di l'eletti di a Corsica ... S'è n'avemu sceltu di turnà à parlanne oghje, soca chì, al dilà di a decisione di tene apertu u CAPES per un'antru annu, ne simu sempre à chì feremu. Per puntellà u nostru accostu, unepoche d'usservazioni ci parenu di primura :

- Avemu toccu, voli sì, voli nò, i termini di l'ufferta cusidetta uzzianale. In u secundariu, ci hè poca spera d'evuluzione faveruvele, riguardu à i sciffri di l'effettivi di e scole di Lingua Corsa.
- Per ciò chì tocca à u Retturatu, nisun pulitica di cortu è longu andà inquantu à a gestione di i posti di professori di Corsu. Volesi dì chì si ne ghjunghje à una situazione bella strana: s'aprenu posti à u cuncorsu, sapendu bè capunanzu ch'ellu ùn ci hè più pussibilità di piazzà l'insignanti. Ma u peghju serà piuttosto ch'ellu ùn si hè mai riflettutu per ghjuvacci altrimenti di sti persunali ricutati, per indettu à prò di a pruduzione di documenti, d'una messa à dispusizione in u quattru di u pianu di furmazione o di sviluppu di a lingua.
- A' à sti patti, a situazione di l'insignamentu bislinguu ùn pò chè andà di male. Malgradu tanti discorsi ufficiali, una logica ingiru à prugetti di stabbilimenti, l'inditure persunale di tanti professori, per avà ùn ci hè nisun pulitica di regulazione accademica. Vogliu vene à di chi prestu prestu sta situazione hà da mette in periculu ancu l'insignamentu bislinguu in u primu gradu.

- L'università: hà messu in piazza una furmazione di tippu CLES (certificatu di cumpetenza in lingua di l'insignamentu superiore), hà ricutatu ottu professori di Corsu per stu certificatu indispensabile per passà u cuncorsu di professore di e scole ma vale solu chè per e lingue strangere. Ma andendu cusì, chì anu da diventà tutti sti studenti scritti in Studii Corsi ?

Ma ch'e sappia :

- ùn ci hè nisun discriminazione, in i testi di u cunsigliu di l'Auropa, trà lingue strangere, minoritarie o regionale. Megliu, e lingue strangere è regionale anu listessa prugramazione in u quattru di u Certificatu Europeu di Cumpetenze in Lingua,. E' po a Francia hà firmatu u cartulare di l'Unesco à nant'à a ricunniscenza di a diversità culturale, e lingue regionale sò scritte in a custituzione, l'Assemblea di Corsica hà vutatu un pianu di sviluppu è ci serà un CAPES di Corsu un'antru annu. Simu salvi...

In fin'di contu, à noi tocca à gestisce tutte e difficoltà di messa in opera di u nostru pianu di sviluppu - per quale s'aspetta sempre chì u statu dica qualcosa – mentre ch'ella ùn ci hè stampa di prutezzione ghjuridica à prò di u corsu.

Si sà ch'in logica, a lege impone un quattru generale è fissa una regula cumuna. Vistu l'assenza di statutu per a lingua, l'interessu generale quì si riduce à una mansa di dispusizione particolare, sperendu à l'ultimu una convergenza propiu miraculosa. Parlu di miraculu perchè chì trent'anni dopu ne simu sempre à sicutera. Trent'anni di sperienze, di non decisione à nant'à a quistione di u statutu chì palesanu bè l'inanità di qualunque pulitica linguistica chi pratende esse criduta è perdurevule.

Hè capita ch'elli ci sò u pianu di sviluppu è dinù a cunvenzione Statu-CTC chì si compierà in u 2013, ma sapemu bè ch'elli ùn permetteranu micca à a lingua di piglià u so avviu. Fattu si stà chì vint'anni dopu à a creazione di u CAPES, simu propiu in fin' d'un prucessu, quellu di l'uzziunalità.

Quindeci mesi dopu à l'elezzione territoriale, speremu quantunque chì l'avvene di a Lingue ferma una priurità per tutti. Ma à chì ne simu cù u Statu, di l'abboccu d'una negoziazione, per parlà per indettu di a legitimità di a creazione d'un'agregazione di Corsu?

Quindeci mesi dopu à l'elezzione territoriale, ùn simu ancu à vede sorge qualcosa di fundamentale, da pudè cambià a sorte d'una lingua cundannata à morte.

A mo quistione ùn purterà micca nant'à l'apertura di u CAPES 2013 o 2014. Purterà piuttosto di a furmazione, iniziale è cuntinua, di i mezi finanziari da mette in ballu in u quattru di prerogative spartute, di a creazione di l'Uffiziu di a Lingua, di l'Ufficialisazione di a lingua è di l'urganisazione di l'assisi di sta lingua.

Per compie, qualessa hè a definizione di a vostra pulitica à longu andà riguardu à U Corsu?

Pigliate e vostre respunsabilità, perchè chì stamane, à nome di a giuventù, quella d'una Corsica schietta chì brama un'identità muderna, a vi dumandemu semplicemente, o sgiò Presidente : induve andemu cusì?